

<https://doi.org/10.46991/hc.2023.19.1.238>

The Image of a Siren in Armenian Miniature Painting

Anahit Aperyán

<https://orcid.org/0000-0001-5801-0322>

Mother Armenia military museum, guide

anahit_apteryan@mail.ru

Keywords: Gospel, Armenian miniature, mythical creature, siren, devil, harbinger, ornament

Medieval miniaturists did not create random figures to illustrate manuscripts. Each of them had their own role and interpretation, and among those characters are also the sirens, about which there are few studies. In our work we studied 45 sirens images (in shrines, headdresses, lordly scenes) and after analyzing a few of them we came to the following conclusions: In the pre-Christian period, sirens with the meaning of demons, monsters, evil spirits, which are mentioned in mythological legends, acquire a completely new meaning in the Christian period. Sirens were known for their sweet and enchanting sound. It is likely that if before the adoption of Christianity they used their enchanting voice to capture and kill people, then in the Christian period they announced Christian events with their enchanting voice. Many examples testify to that. In the Christian period, sirens announced the coming of Christ and opened the way for people to the Christian faith. So we can say that sirens are revealed as demons possessed by evil spirits in the pre-Christian period, which in the Middle Ages become harbingers of Christian realities.

Հուշկապարիկի կերպարը հայ մանրանկարչության մեջ

Անահիտ Ապերյան

«Մայր Հայաստան» ռազմական պատմության թանգարան, էքսկուրսավար

Հիմնաբառեր՝ Ավետարան, հայկական մանրանկարչություն, առասպելական էակ, սիրեն, հրեշ, ավետաբեր, զարդանախշ:

Միջնադարյան մանրանկարիչները պատահական կերպարներ չեն ստեղծել ձեռագրերը նկարազարդելու համար. նրանցից յուրաքանչյուրն ունեցել է պատկերման իր յուրօրինակ

History and Culture. Journal of Armenian Studies, Vol.-1(19), 2023, pp. 238-260



This work is licensed under a Creative Commons Attribution-NonCommercial 4.0 International License.

Received: 09.12.2022

Revised: 22.12.2022

Accepted: 15.06.2023

© The Author(s) 2023

մոտեցումը: Այդ պատկերված կերպարներից յուրաքանչյուրն ուներ իր ուրույն դերն ու մեկնաբանությունը, և այդ կերպարների թվին են դասվում նաև հուշկապարիկ-սիրենները, որոնց մասին ուսումնասիրությունները սակավ են: Մեր աշխատանքում ուսումնասիրել ենք 45 հուշկապարիկի պատկեր (խորաններում, գլխազարդերում, լուսանցազարդերում, տերունական տեսարաններում) և դրանցից մի քանիսը վերլուծելուց հետո հանգել ենք հետևյալ եզրակացություններին: Նախաքրիստոնեական ժամանակաշրջանում բոլորովին նոր նշանակություն են ձեռք բերել դևերի, հրեշների, չար ոգիների նշանակություն ունեցող հուշկապարիկները, որոնք հիշատակվում են դիցաբանական լեգենդներում: Հուշկապարիկները հայտնի էին իրենց քաղցր ու դուրսիչ ձայնով: Հավանական է, որ եթե մինչ քրիստոնեության ընդունումը նրանք օգտագործում էին իրենց դուրսիչ ձայնը մարդկանց բռնելու և սպանելու համար, ապա քրիստոնեական շրջանում, նրանք իրենց դուրսիչ ձայնով ազդարարում էին քրիստոնեական իրադարձությունների մասին: Դրա մասին են վկայում բազմաթիվ մանրանկարչական և այլ օրինակներ: Քրիստոնեական ժամանակաշրջանում սիրենները ազդարարում էին Քրիստոսի գալուստը և մարդկանց համար ճանապարհ բացում դեպի քրիստոնեական հավատքը: Այսպիսով՝ մենք կարող ենք ասել, որ վերջիններս բացահայտվում են որպես չար ոգիներ, դևեր նախաքրիստոնեական շրջանում, իսկ միջնադարում դառնում են քրիստոնեական իրողությունների ավետարեր:

Образ сирин в армянской миниатюрной живописи

Анаит Аперян

Музей военной истории "Мать Армения", Гид

Ключевые слова՝ Евангелие, армянская миниатюра, мифическое существо, сирена, чудовище, предвестник, орнамент.

Средневековые миниатюристы не создавали случайных фигур для иллюстрации рукописей. У каждого из них была своя роль и интерпретация, и среди этих персонажей есть и сирены, о которых мало исследований. В нашей работе мы изучили 45 изображения сирен (в святилищах, головных уборах, барских сценах) и, проанализировав несколько из них пришли к следующим выводам: В дохристианский период сирены со значением демонов, чудовищ, злых духов, которые упоминаются в мифологических легендах, в христианский период приобретают совершенно новое значение. Сирены были известны своим сладким и чарующим голосом. Вполне вероятно, что если до принятия христианства они использовали свой чарующий голос для захвата и убийства людей, то в христианский период они возвещали своим чарующим голосом христианские события. Об этом свидетельствуют многие примеры. В христианский период сирены возвещали приход Христа и открывали людям путь к христианской вере. Итак, мы можем сказать, что сирены раскрываются как демоны, одержимые

нечистью в дохристианский период, которые в Средние века становятся предвестниками христианских реалий.

* * *

Ներածություն: Միջնադարյան մանրանկարիչները պատահական կերպարներ չէին ստեղծում՝ ձեռագրերը նկարագարողելու համար: Նրանք մեծ չափերով ձեռագրերի զարդանկարային հորինվածքում ներառում էին առասպելական էակների, որոնք մասամբ հին, արդեն մեռած, պաշտամունքների՝ արեգակի, ջրի, մեռնող և հարություն առնող աստծո, բերրիության, կենսաց ծառի արտացոլումն էին: Այդ առասպելական էակների թվին են դասվում նաև հուշկապարիկները: Զարգացած միջնադարի հայ ձեռագրարվեստում հուշկապարիկների պատկերումը ստացել է նշանակալի դեր՝ դառնալով ձեռագիր մատյանների գեղարվեստական հարդարանքի կարևոր մանրամասն [Khandanian, 1978, 377-394]: «Հուշկապարիկ» (պարսկերեն՝ yušk) նշանակում է «էշ» և «պարիկ»՝ առասպելական ոգի: Եզնիկը հուշկապարիկը համեմատում է հունական nokentáuros-ի կամ իշացուլի հետ [Մալխասեանց, 1944, 1567]:

Ժամանակի ընթացքում այս կերպարները կատարելագործվել են գույների համադրության ու ոճավորման արդյունքում:

Ներկայացնենք հայ մանրանկարչական ձեռագրերի խորաններում, անվանաթերթերում, գլխագարդերում հանդիպող առասպելական էակ հանդիսացող հուշկապարիկներից մի քանիսը՝ ցույց տալու դրանց խորհրդաբանության փոփոխությունը:

Ձեռագիր №6288 [Հաղբատի ավետարան, 1211 թ., նկարագարող՝ Մարգարե]: Խորանի հիմքի վրա՝ ձախ կողմում, կանաչ ծառ է պատկերված, որին ամբողջ երկարությամբ փաթաթված է վիշապ և սպառնում է ճյուղին կանգնած թռչնաձագերին: Դրանից վերև՝ խորանի քիվի վրա, մեկ ոտքի վրա կանգնած է փարթամ պոչով հուշկապարիկ՝ գլխին սրածայր գլխարկ: Վերջինս նայում է աջ: Վարսերը երկար են, մարմնի վրա կարող ենք տեսնել նախազարդեր: Թևերն ու ոտքերը կարմիր գույնով են պատկերված, իսկ մարմինը՝ ոսկեգույնով: Հպարտ կեցվածքով է, բերանը՝ փակ (Պտկ. 1):

Հռոմկլայի ավետարանը (թիվ 69/151, 1244 թ., Կ. Պոլիս, գրիչ՝ Սերովբե Ալիշան, ծաղկող՝ Կիրակոս Հռոմկլայեցի) գրված է Կոստանդին Ա կաթողիկոսի հրամանով 1229-1267 թթ. [«Հայկական մանրանկարչություն», 2000 թ., 9-10]: Հուշկապարիկի պատկերի հանդիպում ենք «Եվսեփոսի նամակը Կարպիանոսին» էջում: Աշխարհի չորս կողմերը խորհրդանշող ճակատագրում՝ մեղալիոնում, պատկերված է Եվսեփոսը՝ մագաղաթը ձեռքին: Նրանից վերև՝ աջ ու ձախ անկյուններում, ներկայացված են թռչնի մարմնով և մարդու գլխով հուշկապարիկներ: Վերջիններս, դեմ դիմաց կանգնած, նայում են հակառակ ուղղություններով: Մարմինները արված են կարմիր գույնով, թևերն ու ոտքերը՝ կանաչ: Մանրանկարում սիրենները գլխաբոբիկ են, բերանները՝ բաց, այնպիսի տպավորություն է ստեղծել մանրանկարիչը, որ կարծես երգում են: Նշենք, որ մինչքրիստոնեական շրջանում հուշկապարիկ-սիրենները դյուբիչ ձայնով իրենց մոտ էին կանչում և սպանում մարդկանց: Հավանական է, որ եթե քրիստոնեության ընդունումից առաջ սպանում էին մարդկանց, ապա՝ քրիստոնեական շրջանում, իրենց դյուբիչ ձայնով ավետում էին քրիստոնեական իրողությունները: Հաջորդ մանրանկարչական օրինակների դիտարկումը կնպաստի մեկնաբանման իսկությունը (Պտկ. 2):

«Գիրք ձեռնադրութեանց» [թիվ 1657/440, 1248 թ., Կիլիկիա] Սիրարփի Տեր-Ներսիսյանն այս աշխատության ձեռագրի մանրանկարները համեմատում է 1239 թ. ստեղծված ասորական մանրանկարների հետ [Ճանաչեան Մեսրոպ, 1966, 60-61]: Սիրենների պատկերների հանդիպում ենք ուղղանկյուն կիսախորաններից մեկում: Մարդագլուխ թռչունները դեմ դիմաց են պատկերված, կանաչ մարմնով, վարդագույն կռնակներով ու կարմիր թագերով: Կապույտ արմավենիների ու ոստազարդերի մեջ գտնվող էակները զարմանք արտահայտող դեմքերով նայում են վերև, նրանց բերանները փակ են: Այստեղ նույնպես մանրանկարիչը մարմնի ավարտվող հատվածից սկսել և պատկերել է բուսական զարդանախշեր (Պտկ. 3):

Հռոմի ավետարան (թիվ 1374/90, 1254 թ.: Գրիչ և ծաղկող՝ Հովհաննես քահանա, ստացող՝ Հակոբ աբեղա) [«Հայկական մանրանկարչություն», 2000 թ. հուլիս, 29]: Հուշկապարիկների հանդիպում ենք Մարկոսի ավետարանի սկզբնաթերթում: Սկզբնաթերթի կիսախորանի զարդարված Ուաձև գլխազարդի կարմիր խորքի վրա՝ երկու եզրերին, կապույտ, սպիտակ գծերով պատկերված են դեմ դիմաց կանգնած, հայացքները դեպի դիտողը հառած երկու սիրեններ: Ի տարբերություն Հռոմկլայի ավետարանում հանդիպող հուշկապարիկների, որոնց բերանը բաց էր, այստեղ տեսնում ենք փակ բերաններով հուշկապարիկների, ինչպիսին կտեսնենք նաև Ջեթունի ավետարանում: Ներկայացված են թագերով, դեմքի հանդարտությամբ: Ոտքերից մանրանկարիչը նոր բուսական զարդանախշեր է պատկերել: Սկզբնատառ Ս գլխազրի մեջ գրված է կրճատված վերնագիրը. «Սկիզբն անտա բան Յի(Յիսուսի) Քի(Քրիստոսի), որպես և գրեալ է ի մարգարես. ահաւասիկ եւ առաքեմ զիրեշտակ իմ առաջն քո, որ հանդերձեսց է ըզճանապարհ քո, առաջի քո: Չայն բարբառոյ յանապատի: Պատրաստ արեք զճանապարհ տեառն և ուղիղ արարեք զշաւիղ ըսնորա: Եւ եղև զի յովհաննէս մկրտեր յանապա»: Հետագա ուսումնասիրությունները ցույց կտան, որ հուշկապարիկի պատկերների հանդիպում ենք այն տեքստերի հարևանությամբ, որոնցում ասվում է. «Պատրաստ արեք տիրոջ ճանապարհը», որը ևս մեկ անգամ հավաստում է՝ քրիստոնեական շրջանում պատկերված հուշկապարիկ-սիրենները իրենց քաղցր ձայնով ավետում էին քրիստոնեական իրողություններ: (Պտկ. 4)

Ջեթունի ավետարան (№ 10450, 1256 թ.: Գրել ու նկարագրող է Թորոս Ռոսլինը Կոստանդին Ա Բարձրբերդցու պատվերով) [«Հայկական մանրանկարչություն», 2014, 66]: Հուշկապարիկի պատկերի հանդիպում ենք Եվսեբիոսի թղթում (էջ 3բ): Ուղղանկյուն գլխազարդում՝ լուսնից վերև կիսաբոլոր շրջանակից դուրս՝ գլխազարդի երկու անկյուններում, պատկերված են երկու փոքրամարմին հուշկապարիկներ: Վերջիններս, դեմ դիմաց լինելով, նայում են միմյանց: Հետաքրքրական է, որ թռչնի թևերից զատ՝ տեսնում ենք մարդկային ձեռք, որն առասպելական կերպարը մոտեցրել է բերանին՝ մտածմունքի տպավորություն ստեղծելով, իսկ մյուս ձեռքով հավանաբար բռնել է ծաղիկ: Մարմինները թանաքագույն են, իսկ թևերն ու ոտքերը՝ վարդագույն: Սիրենները գլխաբոբիկ են, փոքր-ինչ երկար մազերով: Կարծես կանգնած լինեն ճակատազարդի ներսի բոլորակի վրա: Ավետարանում պատկերված հուշկապարիկի տեսակը մտածելու տեղիք է տալիս, քանի որ, եթե մինչ այս ուսումնասիրած մանրանկարներում տեսնում էինք թռչնի թևերով սիրենների, ապա այստեղ կան մարդկային ձեռքեր: Հավանական է, որ մանրանկարիչը պատկերել է թատերական կերպարների: Ինչպես արդեն նշել է Էմմա Պետրոսյանը, հուշկապարիկ-սիրենների

պատկերումը մանրանկարչության մեջ կարող է լինել թատերական մտածողության արգասիք (Պտկ. 5):

Կիլիկյան ձեռագիր՝ նկարագարոված Սմբատ Գունդստաբլի (1206-1276 թթ.) պատվերով (XIII դ. կեսեր): Ոսկերչական արվեստով ստեղծված ու ոսկով պատված զարդանախշերի մեջ պատկերված են բազմազան պատկերներ, որոնց մի մասը կապված է թատերական ու կրկեսային ներկայացումների հետ: Խորաններից մեկում պատկերված են երկու հուշկապարիկներ, որոնց մեկ այլ իմաստ, ինչպես գիտենք, նրանց բնորոշում էր որպես թատրոնի ու կրկեսի մեջ հանդես եկողներ: Ուստի չի բացառվում, որ այս ձեռագրում նրանց պատկերելը ևս կարող է առնչվել թատերական մտածողությանը: Այդպիսի օրինակ մենք արդեն տեսանք Ջեյթունի 1256 թ. ավետարանում: Ձեռագրում՝ խորանի ճակատագարդում, ոսկեգույն խորքի վրա են պատկերված երկար պոչերով, թագապսակ սիրենները: Այստեղ մանրանկարիչը մարմինը, ամբողջ դաշտը ոսկյա ֆոնի վրա լցրել է բուսական զարդանախշերով, որոնց մեջ ներգծել է երկու հուշկապարիկներին: Սիրենների թագն ու մարմինը կարմիրով են արված, իսկ թևերը՝ կապույտ: Նրանց բերանները բաց են, ինչպես տեսանք Հռոմկլայի ավետարանում և նայում են միմյանց, սակայն Հռոմկլայի ավետարանում նայում էին հակառակ ուղղություններով: Այստեղ նույնպես բաց բերանով պատկերված հուշկապարիկները երգում են և այդպես ավետում քրիստոնեական նոր հավատքը (Պտկ. 6):

Օշին Մարաջախտի ավետարան (1274 թ., Միս, գրիչ՝ Կոստանդին դպիր): Բազմաթիվ սկզբնատառեր պատկերված են տարբեր կերպարներից և դրանց համակցություններից՝ թռչուն ու օձ, թագավոր, մարդ ու օձ, մարդու գլխով երկու թռչնի մարմին ունեցող պատկերներ: Կանոնների տախտակների գունագեղ ձևավորումը բնորոշ է ավելի ուշ կիլիկյան ավանդույթի մեծագույն գործերին, ինչպես իր շքեղությամբ, այնպես էլ իր նուրբ մանրամասնությամբ ու նորարարական պատկերներով [Mathews, 1994, 193-194]: Հետաքրքիր է, որ Օշինի ավետարանում հուշկապարիկի պատկերի հանդիպում ենք նվիրաբերման էջում, որտեղ դիցաբանական կերպարը ներկայացված է մեկ գլխով ու երկու թռչնի մարմիններով: Նրանց ոտքերը խաչված են: Պատկերված է բուսական մոտիվներով հարդարված ճակատագարդում՝ ոսկե խորքի վրա, վեր նայելիս: Գլխին ունի կարմիր թագ, որի վրա մանր, դեղին կետերով կարծես քարեր լինեն պատկերված: Դեմքը հանդարտ է, բերանը փակ է պատկերված: Այսպիսի սիրենի օրինակ, որը կանգնած լինի ճակատագարդի մեջտեղում և իր շուրջը համախմբի մանրանկարի մյուս գործող կերպարներին, մենք մինչ այս ուսումնասիրած ձեռագրերից և ոչ մեկում չենք հանդիպել: Այստեղ՝ ոսկե խորքի վրա, գրված է նվիրաբերման տեքստը. «ՄԱՅ ՅԻՇՍԱԿ ԲԱՐԵԱՅ ԼԻՑԻ ԱԻՇԻՆՍ ՈՐԻՆ ԸՍՏԱՑՈՂԻ ԵՒ ԿՈՍՏԱՆ ԳԵԱ ԵՒ ՍՏԵՓԱՆԻ ԾՆՈՂԱՑՆ ՈՐԻՆ ՈՐ Ի ՅԵՐԿՆԻ ՆԱԵԻ ՈՐԴՈՑՆ ԻԻՐ ՑԱՆԿԱԼԻ ՆԱԽ ԿՈՍՏԱՆԴԵԱ ՄԵԾԻ ԻՇԽԱՆԻ ԱՅԼ ԵՒ ՀԵԹՄՈՅ ՊԱՏԱՆԵԿԻ ԵՒ ԱՄԵՆԱՅՆ ՆՈՑԻՆ ՏՈՀՄԻ» (Համապատասխան բնագրին): Մինչ այս ուսումնասիրած ձեռագրերից և ոչ մեկում չենք հանդիպել հուշկապարիկների պատկերներ, որոնք նկարված լինեն նվիրաբերման էջում: Առավել հետաքրքրական է այս առասպելական կերպարի երկու մարմնով հանդես գալը: Թե ինչու է մանրանկարիչը պատկերել այդպես կարող ենք կատարել որոշ ենթադրություններ: Շատ հավանական է, որ կապված լինի «Մի Քրիստոս յերկուս բնութիւնս» բանաձևի հետ, այսինքն՝ ընդունվում էր Քրիստոսի և՛ մարդ, և՛ Աստված լինելու գաղափարը, իսկ այս մանրանկարում տեսնում ենք երկու մարմնով և մեկ գլխով կերպարի:

Գրիգոր Տաթևացին իր «Գիրք հարցմանց» երկում գրում է. «Եւ դարձեալ «Քրիստոս» անունն էլ միաւորութիւն է նշանակում երկու բնութեան, ըստ որում Աստուածութիւնն օճեց մարդկութեանը, ինչպէս ասում են Աստուածաբանը եւ սուրբ Կիրեղը» [Տաթևացի, 2020, 157]: Մենք արդէն նշեցինք, որ քրիստոնէական շրջանում և հատկապէս մանրանկարչության մեջ հուշկապարիկների պատկերում էին այն տեքստերի հարևանությամբ, որոնք ավետում էին քրիստոնէական իրադարձություններ: Ուստի կարող ենք ասել, որ այստեղ մանրանկարիչը, պատկերելով երկու մարմիններ, նկատի է ունեցել մարդկային ու աստվածային էությունները, իսկ մարդկային գլուխը հավանաբար Քրիստոսն է, որ շարժում է այդ երկու ուժերին: Այս վարկածը, այդուհանդերձ, վիճահարույց է: Նշենք նաև, որ հուշկապարիկը պատկերված է թագով, ինչը հավանական է, որ կապված լինի ձեռագրի թագավորական ընտանիքին պատկանելու հետ (Պտկ. 7):

Ձեռագիր № 1746 (XIII դ., ենթադրաբար 1280 թ., գրիչ՝ Մխիթար դպիր (Երզնկացի²): Ստացող՝ պրն. Յովհաննես [«Ցուցակ ձեռագրաց Մաշտոցի անվան Մատենադարանի», հատոր Ա, 1970, 627]: Միբեռների պատկերներ տեսնում ենք Դավիթ Անհաղթի պատկերից վերև՝ ճակատագարդում՝ եզրագծված կարմիր գույնով: Նրանք թագակիր են, ամբողջությամբ ոսկեգույն՝ կապույտ խորքի վրա պատկերված: Ոսկին նշանակում է Տիրոջ անսուտ ու անապական խոսքերը այստեղ, ինչպէս ասաց, թե երկինքն ու երկիրը կանցնեն, բայց խոսքերը չեն անցնի [Ղազարյան Վ., 2004, 89-91]: Մխիթար դպիրը պատկերել է բավական փարթամ մարմնով, դեմքի լարվածությամբ, շքեղ թևերով սիրենների: Ոտքերը ծավալված են: Գեղեցիկ զարդանախշերում դեմ դիմաց գտնվող սիրենները նայում են միմյանց, սակայն բերանները փակ են (Պտկ. 8):

Ձեռագիր № 9422 (XIII դարի 80-ական թթ., Կիլիկիա: Այս ձեռագրի հիշատակարանը կորած է, ծաղկողի անունն էլ անհայտ է): Մանրանկարները հազեցած են տարատեսակ կերպարներով, օրինակ՝ մեկ գլուխ և երկու մարմին ունեցող (bicorporate) արարածներով [Զուգասզյան Ս., 2014, 1]: Այս մատյանում հուշկապարիկ-սիրենների պատկերների հանդիպում ենք խորաններից մեկի ճակատագարդում, որին առանձնակի շքեղություն են հաղորդում ոսկյա պատկերի վրա արված բուսական զարդանախշերը, կենդանակերպ կերպարները: Ճակատագարդի վերևի աջ ու ձախ անկյուններում պատկերված են հուշկապարիկները: Նրանք դեմ դիմաց են, նայում են հակառակ ուղղություններով: Այդպիսի օրինակ արդեն տեսանք Հռոմկլայի ավետարանում: Այստեղ մանրանկարիչը վերջիններիս պատկերել է զվարթ դեմքերով: Ի տարբերություն մինչ այս ուսումնասիրած մանրանկարներում հանդիպող հուշկապարիկների պատկերների՝ այստեղ չափերով անհամեմատ ավելի փոքր են, իսկ ոտքերի փոխարեն պատկերված են բուսական զարդանախշեր: Մանրանկարիչը բերանները փակ է պատկերել, և նրանք ունեն գլխարկներ: Գլխարկներն ու թևերը կարմիր գույնով են արված, իսկ մարմինները՝ կապույտ (Պտկ. 9):

Ձեռագիր № 4820 Մ. (XIII-XIV դդ. ավետարան, ծաղկող, կազմող՝ Ովանես: Ստացող՝ Սարգիս քահանա և կինը՝ Թամար): Հիշատակարանը չի պահպանվել, ընդօրինակման ժամանակի ու վայրի մասին ևս որոշակի տեղեկություններ չկան: Մատենադարանի համապատասխան քարտերում ու «Ցուցակ ձեռագրաց»-ում նշված են XIII-XIV դարերը: Մանրանկարների ոճական ընդհանուր առանձնահատկություններից ելնելով՝ ենթադրեցինք, որ ամենայն հավանականությամբ Վասպուրականի մանրանկարչության դպրոցի արգասիք են [Հակոբյան Հրավարդ, 1989, 135]:

Հուշկապարիկի պատկերի հանդիպում ենք Ավետարանի՝ Մատթևոսի անվանաթերթում (Էջ 16ա): Բավական մեծ չափերով հուշկապարիկները պատկերված են մանրանկարի ճակատագրում՝ բուսական զարդանախշերով պատված: Թագակիր են, կանգնած են դեմ դիմաց՝ նայելով միմյանց: Մարմիններն ամբողջությամբ թանաքագույն են, իսկ ոտքերը՝ մարմնագույն: Կանգնած են հանդարտ, ունեն երկար պոչեր, նման են սիրամարգերի պոչերին, այդպիսի երկար պոչերով սիրենների օրինակ մենք արդեն տեսանք Սմբատ Գունդստարի պատվերով ստեղծված ավետարանի մանրանկարներից մեկում: Բերանները փակ են, իսկ նրանց մեջտեղում փոքր չափերով վարդյակի պատկեր է երևում: Ճակատագրողի ներքևի բացվածքում գրված է «ԶԹամար ստացողս յիշեա: Աւետարան ըստ մաթեոս...»: Իսկ ճակատագրողից ներքև հրեշտակի վերածված Գ տառն է, և գրված է. «Գիրք ծննդեան ՅԻ(Յիսուս) ՔԻ(Քրիստոսի) որդո Դաւթի...»: Ավետարանում հուշկապարիկների պատկերումը տվյալ անվանաթերթում հավանաբար նպատակ է ունեցել ավետելու Քրիստոսի տոհմաբանությունը: Այսպիսի տեքստի հարևանությամբ հուշկապարիկների պատկերներ կտեսնենք նաև հետագայում ուսումնասիրվող մանրանկարներում (Պտկ. 10):

Ձեռագիր № 3722 (1304 թ., Նախիջևան, ծաղկող, կազմող՝ Սիմեոն, գրիչ՝ Յակոբ): Չորս ավետարանիչների պատկերներից բացի՝ տեսնում ենք նաև նկարագրված բազմաթիվ լուսանցազարդեր, որոնց թեմաները հիմնականում կապված են հեթանոսության մնացուկների հետ, որոնք այդ շրջանում հավանաբար արդեն կորցրել էին իրենց իմաստը, բայց պահպանվել էին ժողովրդական արվեստում [Դուռնովո Լ. Ա., 1969, 208]: Ղուկասի ավետարանի անվանաթերթի Ս-աձև գլխագրում տեսնում ենք երկու հուշկապարիկներ, որոնք զարդարված են կանաչ ու կապույտ լուսապսակներով: Լուսապսակով պատկերում էին սրբերին, իսկ այստեղ լուսապսակով են հանդես գալիս այն խառնածին էակները, որոնք, ինչպես նշվեց, այլ իմաստ ունեին մինչ քրիստոնեությունը, և նրանց համարվում էին չար ոգիներ, դևեր: Նրանք պատկերված են փակ բերաններով, այտերի բնորոշ կարմրությամբ: Կանգնած են դեմ դիմաց ու նայում են վերև: Այդպիսի օրինակ տեսանք նաև Վենետիկի թիվ 1657/440 (XIII դար) ձեռագրում: Դիտարկվող ավետարանում մարմինները ներկայացված են կապույտ գույնով, ոտքերը՝ կարմիր, իսկ թևերը՝ բազմագույն: Ճակատագրողն աչքի է ընկնում վառ գույներով հարդարված բուսական զարդանախշերով (Պտկ. 11):

1307 թ. «Եսայի Նչեցու ավետարան» (նկարիչ՝ Թորոս Տարոնացի, Սուրբ Ղազար վանքի մատենադարան, № 1917: Այն պատրաստվել է, ինչպես ասված է հիշատակարանում, Գլաձորի համալսարանի ղեկավար Եսայի Նչեցու և նրա օգնական Դավթի համար): Թորոս Տարոնացին իր գործունեության այդ վաղ շրջանում դեռ հեռու էր կիլիկյան արվեստի ազդեցությունից, և այդ պատճառով նրա այս աշխատանքը բուն Հայաստանի արվեստի շունչն ունի [Ավետիսյան Ա. Ն., 1971, 87: Եսայի Նչեցու ավետարանի մանրանկարներն աչքի են ընկնում մեծ գեղարվեստականությամբ և ներդաշնակորեն ընտրված գույների թարմությամբ [“Manuscripts armenienses illustres...”, 110:

Ավետարանի երկու մանրանկարներում էլ հանդիպում ենք հուշկապարիկների պատկերների: Մեկը պատկերված է ճակատագրողի ներսում, իսկ մյուսը՝ ճակատագրողից դուրս՝ քիվի վրա: Ուղղանկյուն ճակատագրողի ներսում՝ ոսկե խորքի վրա, պատկերված են երկու երկար մազերով հուշկապարիկներ, որոնք նայում են տարբեր ուղղություններով՝ մարմինները շրջած իրար կողմ: Բերանները փակ են, մարմիններն արված են կապույտ գույնով, թևերը՝ կարմիր, կանաչ, իսկ ոտքերը՝

վառ կարմիր: Այս ձեռագրի մյուս մանրանկարի ճակատագարդից աջ տեսնում ենք հուշկապարիկի եզակի օրինակ: Վերջինս ձախ ձեռքով բռնել է կարմրակտուց թռչնի երկու ոտքերից, իսկ մյուս ձեռքով նրա բերանին ինչ-որ բան է մոտեցնում: Միրենը ներկայացված է գլխարկով, որի վրա խաչի պատկեր կարող ենք տեսնել, այդպիսի օրինակ մենք արդեն տեսանք Հաղբատի ավետարանում և կտեսնենք նաև 1323 թ. Գլաձորում կրկին Թորոս Տարոնացու կողմից նկարագրված ավետարանում: Այստեղ հուշկապարիկը կանգնած է, մարմինն ու մարդկային ձեռքերը կապույտ գույնով են ներկված, թռչնի թևերը՝ վարդագույն, ոտքերը՝ կարմիր: Ամբողջ կերպարը եզրագծված է ոսկեգույնով: Մարդկային ձեռքով հուշկապարիկի մենք արդեն տեսանք Զեյթունի 1256 թ. ավետարանում: Թորոս Տարոնացին իր գունավառ պատկերների, թռչունների շնորհիվ ձեռագրերին դրախտային գեղեցկություն է պարգևել: Հետաքրքրված լինելով ժողովրդական ավանդապատումներով ու թարմ վերաիմաստավորումներով՝ մանրանկարիչը բազում առեղծվածային կերպարներ է պատկերում իր ձեռագրերում (Պտկ. 12, 13):

Ձեռագիր № 1949 (1312 թ., Սարգիս Պիժակի ավետարան: Նկարված է Միսում): Մատթևուսի անվանաթերթում ենք հանդիպում սիրենների: Ճակատագարդում՝ մուգ ֆոնի վրա են պատկերված: Մարմինները կապույտ գույնով են արված, իսկ թևերը՝ կարմիր: Կանգնած են դեմ դիմաց, նայում են իրար: Մանրանկարի վնասված լինելու պատճառով բերանների հատվածը չի երևում, ուստի չենք կարող ասել փա՞կ, թե՞ քա՞ց բերաններով են: Ոտքերը չեն երևում, առավելապես բուսական զարդանախշեր են ներկայացված ոտքերի հատվածում: Ճակատագարդից ներքև հրեշտակի տեսքով Գ տառն է պատկերված, ինչպես տեսանք № 4820 ձեռագրի նույն Մատթևուսի անվանաթերթում, և գրված է. «Գիրք ծննդեան ՅԻ(Յիսուս) ՔԻ(Քրիստոսի) որդու Դաւթի...»: Ուստի այստեղ ևս կարող ենք ասել, որ հուշկապարիկներն ավետում էին Քրիստոսի տոհմաբանությունը: Սարգիս Պիժակը հուշկապարիկների պատկերել է շարակնոցներում, իսկ հաջորդիվ կտեսնեք այդպիսի մեկ օրինակ (Պտկ. 14):

Սարգիս Պիժակի կողմից ստեղծված շարակնոց (1322 թ.): Ինչպես 1312 թ. ավետարանում, այնպես էլ այստեղ, Սարգիս Պիժակը գլխագարդերից մեկի հարդարանքում պատկերել է հուշկապարիկների: Նրանցից մեկը կանացի դիմագծեր ունի, իսկ մյուսը՝ տղամարդու: Ուշադիր զննելով թագերը՝ կարող ենք տեսնել, որ դրանք նույնպես տարբերվում են իրարից: Թագակիր սիրենները մուգ ֆոնի վրա ներկայացված են երեք քառորդով: Մեկը մյուսից տարբերվում են փետուրների շքեղ գունազարդմամբ: Փակ բերաններով հուշկապարիկները ներկայացված են դեմ դիմաց, նայում են վերև, առանձնանում են դեմքի հանդարտությամբ: Ճակատագարդի ներքևի բացվածքում գրված է. «Կանոն մեծի պասեքին», իսկ ավելի ներքև գրված է. «Այս ար յարեուտի մեռելոց փեսայն անմահ և երկնաւոր. Քեզ աւետիմք բը խընդութե ... հարսնի յերկրէ եկեղեցի. աւրհնեա ի ձայն ցընծութե զաստուած քո սիովն...»: Ամենայն հավանականությամբ հուշկապարիկներն այստեղ ավետում են Քրիստոսի հարությունը (Պտկ. 15):

Ձեռագիր № 6289 (1323 թ., Գլաձորի վանք: Ծաղկող՝ Թորոս Տարոնացի: Կազմող՝ Իբրիանոս (1592 թ.): Ստացող՝ Եսայի վարժապետ (Նչեցի)) («Յուրազակ ձեռագրաց Մաշտոցի անվան Մատենադարանի», 1970, հատոր Ա): Ավետարանում մասնավորապես շլացուցիչ են խորանները, որոնք փայլում են ոսկու առատությունից ու ներկերի պայծառությունից: Բուսական զարդանախշերում կան զանազան տեսարաններ ու զարմանահրաշ էակներ (Դուռնովո, 1969, 208):

Դրանց թվին է դասվում նաև հուշկապարիկ-սիրենի պատկերը: Ինչպես այլ առասպելական թռչուններ, վերջինս նույնպես ներկայացված է գլխարկով, որոնք պալեոլոգյան տարագներ են հիշեցնում [Դուռնովո Լ. Ա., 1969, էջ 209]: Թներն արված են կապույտ գույնով, իսկ մարմինն ու գլխարկը՝ կարմիր: Պատկերված է ուղղանկյուն խորանից դուրս՝ քիվի վրա, հայացքը շրջած է: Խորանից դուրս՝ քիվի վրա պատկերված հուշկապարիկի տեսանք նաև Հաղբատի ավետարանում: Վերջինս նույնպես գլխարկով էր: Այս ավետարանում առասպելական կերպարի բերանը փակ է, իսկ դեմքը կատարված է մանրակրկտորեն (Պտկ. 16):

Ձեռագիր № 7157 (Խազգիրք (Երաժշտական ձայնանիշխներու՝ նոթաներու գիրք), Սկևռա, 1349 թ., գրիչ՝ Գրիգոր քահանա Թահմիզյան, 1980, 118): Հուշկապարիկների պատկերներ տեսնում ենք կիսախորանի ճակատագարդում: Տարբերվում է մյուս ձեռագրերում պատկերված սիրեններից, քանի որ կատարված է սև գույնով: Սև գույնը ցույց է տալիս (Ադամի մուշտակը) և Աստծո խորհուրդը, որ ծածկվեց նրանից [Ղազարյան Վ., 2004, 91-93]: Ոսկե խորքի վրա են սիրենները, իսկ ոսկին համապատասխանում է հինգերորդ էությանը՝ երկնքին: Դիմագծերն ընդգծված չեն, այդ իսկ պատճառով այստեղ նույնպես չենք տեսնում՝ վերջիններիս բերանները բաց են, թե՛ փակ, ինչպես Սարգիս Պիծակի 1312 թ. ավետարանում: Շուրջբոլորը ծաղկային զարդանախշեր են: Թագակիր հուշկապարիկների խմբին են պատկանում: Նրանց միջև՝ մեղալիոնի մեջ, Քրիստոսի պատկերն է: Ճակատագարդից ներքև գրված է. «Երգ գիշերային պաշտամանց հսկման»: Թերևս այս գիշերային երգի հետ է կապվում հուշկապարիկներին սև գույնով պատկերելը: Կարող ենք եզրակացնել, որ այստեղ վերջիններիս ներկայացումը կապվում է խազգրքի հետ, որպես քաղցր ձայնով էակների ու քրիստոնեական իրողություններ ավետելու մասին է վկայում նրանց պատկերումը Քրիստոսի կերպարի հարևանությամբ (Պտկ. 17):

Ձեռագիր № 346 Մ. (Աստվածաշունչ, 1390-1400 թթ., Խիզան, նկարիչ Հովհաննես Խիզանցի: Ստացող՝ Հովհաննես վարդապետ): Վասպուրականի մանրանկարչական դպրոցի յուրահատուկ ու յուրատիպ ոճն իր լավագույն արտահայտությունն է գտել Հովհաննես Խիզանցու արվեստում [Վասպուրականի հայկական մանրանկարչություն, 1978]: № 346 ձեռագրում հուշկապարիկների հանդիպում ենք անվանաթերթի շքեղորեն զարդարված ճակատագարդում: Թագակիր թռչունների մարմինները ուղղված են իրենց գլուխներին հակառակ, և նրանց հայացքները ուղղված են միմյանց միևնույն ուղղությամբ: Մարմինները թանաքագույն են, իսկ թևերն ու թագը՝ բաց դեղնակարմրավուն: Բերանները փակ են, իսկ այտերը կարմրություն ունեն: Գլխագարդից ներքև՝ ամբողջ աջ եզրով, պատկերված է Ի տառը և գրված է. «Ի սկզբանէ արար ԱՕ(Աստուած) գերկին եւ գերկիր: Եւ երկիր էր աներեւոյթ եւ անպատրաստ եւ խավարի վերա անդնոց եւ հոգի ԱՅ(Աստուծոյ)»: Այս ձեռագրում հուշկապարիկների գլխավոր գործառնություններից մեկը եղել է Աստծո կողմից երկրի ու երկնքի արարման մասին ավետելը (Պտկ. 18):

Ձեռագիր № 6305 (XIV-XV դդ., Տաթևի վանք, գրիչ և ծաղկող՝ Գրիգոր քահանա): Թագակիր հուշկապարիկների հանդիպում ենք Մատթեոսի ավետարանի անվանաթերթի ճակատագարդում: Հուշկապարիկներին մանրանկարիչը պատկերել է մուգ կանաչ ֆոնի վրա, կարծես թռիչքի ընթացքում: Սիրամարգին հիշեցնող պոչեր ունեն և քառաթև են: Թագն ու իջեցրած թևերը կարմիր գույն ունեն, վեր բարձրացրած թևերը՝ կանաչ, իսկ մարմինը՝ տարբեր երանգներ: Սիրենները

ներկայացված են դեմ դիմաց՝ իրար նայելիս, փակ բերաններով ու այտերի բնորոշ կարմրությամբ: Ճակատագարդից ներքև վեղար հիշեցնող բացվածքում հիշատակվում է. «Աւետարան ըստ Մաթթիոսի»: Իսկ ճակատագարդից ներքև գրված է. «Գիրք ծննդեան ՅԸ(Յիսուսի) ՔԻ(Քրիստոսի) որդ...»: Ինչպես № 1949 և № 4820 ձեռագրերում, այնպես էլ այստեղ, եզրակացնում ենք, որ հուշկապարիկների դերը եղել է Քրիստոսի տոհմաբանության ավետումը (Պտկ. 19):

Հուշկապարիկ-սիրենների պատկերների հանդիպում ենք նաև տերունական տեսարաններում, օրինակ՝ Թարգմանչաց ավետարանում և 1262 թ. Սեբաստիայի ավետարանում (Բալթիմոր, Ուոլթերս պատկերասրահ, ձեռ. 539 [Ավետիայան Ք., 2007, Ը 49]):

Թարգմանչաց ավետարան (Գրիգոր Ծաղկող, 1232 թ., Մատ. ձեռ. № 2743: Գրիչ՝ Տիրացու, ծաղկող՝ Գրիգոր, ստացող՝ ումն Խաչիկի որդի «աստվածագարդ քահանա» Հովհաննես): Թարգմանչաց ավետարանի ձևավորումները յուրատեսակ կապող օղակ են XII ու XIII դարերի մանրանկարների միջև [Չուգասզյան Լ. Բ, 1986, 114]: Մանրանկարներից մեկը ներկայացնում է Տիրամոր ննջի տեսարանը, որի վերին մասը պսակվում է եռաբաժին կամարով՝ հավանաբար խորհրդանշելով երկնային միստիկ արքայության սահմանը: Կամարի ու պատկերի շրջանակի միջև՝ վերի անկյուններում, ներկայացված են երկու, այսպես կոչված, սիրեններ՝ մարդադեմ թռչուններ (յուրաքանչյուր կողմից մեկական) [Չուգասզյան Լ. Բ, 1986, 79-82]: Այս մանրանկարում պատկերված հուշկապարիկները նայում են հակառակ ուղղություններով, բերանները փակ են, դեմքը՝ հանդարտ: Մարմինը բաց վարդագույնով է արված, իսկ թևերը՝ սև: Ներկայացված են գլխաբոբիկ: Հաշվի առնելով այն փաստը, որ հուշկապարիկ-սիրեններին պատկերում էին ավետման մասին հաղորդող տեքստերի հարևանությամբ, կարելի է ենթադրել, որ այստեղ նրանք ավետում էին Տիրամոր տեղափոխումը երկինք:

Այսպիսով՝ կարող ենք ասել, որ հայ մանրանկարչության մեջ հուշկապարիկների պատկերումը ունեցել է մեկ գլխավոր նպատակ՝ ցույց տալ, որ քրիստոնեության ընդունումից հետո չար ոգիներն անգամ սրբագործվել են՝ ստանալովնոր դեր ու նշանակություն: Հավանական է, որ եթե քրիստոնեության ընդունումից առաջ սպանում էին մարդկանց, ապա քրիստոնեական շրջանում իրենց դյուրիչ ձայնով ավետում էին քրիստոնեական իրողություններն ու հավատքը: Մանրանկարիչների համար որպես հիմք ծառայել է դիցաբանությունը, և իմաստային առումով ենթարկելով փոփոխությունների՝ վերջիններս սկսել են այդ խառնակ կերպարներին պատկերել հայ մանրանկարչության մեջ: Իսկ խորանների հարդարման գեղարվեստական ավանդույթն ու քրիստոնեական ճարտարապետությունը կառուցված են առնվազն մեկ ընդհանուր սկզբունքի վրա. երկուսն էլ պարունակում են խորհրդանշական բազմաթիվ տարրեր, որոնց ըմբռնումը, վերլուծականից բացի, հաճախ նաև հայեցողական մոտեցում է պահանջում [Ամիրխանյան Ռ., էջ 157], (Պտկ. 20):

Միրեն-հուշկապարիկների պատկերները լուսանցագարդերում: Ձեռագրերի ձևավորման մեջ կարևոր տեղ են զբաղեցնում նաև լուսանցագարդերը: Հայկական ավետարաններում հաճախ ենք հանդիպում զանազան լուսանցագարդերի, որոնք ձևավորված են տարբեր պատկերներով, որոնցից յուրաքանչյուրն ունի իր ուրույն իմաստը կամ պարզապես դեկորատիվ հարդարանք է: Միջնադարյան մանրանկարչության մեջ առանձնակի նշանակություն ստացած լուսանցագարդերում

XII դարի վերջերից սկսել են պատկերել մարդակերպ կերպարային ու սյուժետային տարրեր: Ունենալով հստակ գործառական նպատակ՝ դրանք ստացել են գեղարվեստական միավորի արժեք՝ միավորելով ձեռագիր ավետարանների գեղարվեստական մանրամասները մեկ ամբողջության մեջ [Манукян С., 2008, 19-20]: Հայկական ձեռագրերի լուսանցագարդերում նույնպես հանդիպում ենք առասպելական կենդանիների ու թռչունների պատկերների, որոնք յուրահատուկ գեղեցկություն են հաղորդում յուրաքանչյուր մանրանկարի: Առանձնակի նշանակություն ունեն հուշկապարիկ-սիրենների պատկերները լուսանցագարդերում [Манукян С., 2008, 18-19]:

Ձեռագիր № 2952 (XII դար, թերթ 201ա): Լուսանցագարդերում պատկերված են բուսական զարդանախշեր, թռչնային պատկերներ, հուշկապարիկ, խաչ: Մանրանկարի տեքստի աջ եզրին տեսնում ենք սրածայր թագանման գլխարկով հուշկապարիկի պատկեր: Ձեռագրում բացակայում են վերջինիս դեմքի մանրամասները, փոքր-ինչ ընդգծված են աչքերը, քիթը: Գլուխն ու ոտքերը կարմիր գույն ունեն, իսկ մարմինը՝ թանաքագույն: Հատկանշական է, որ վերջինս պատկերված է Ղուկասի ավետարանի 3:1-6 տեքստի հարևանությամբ, որը հետևյալն է. «...Աստուծոյ խօսքն եղաւ Զաքարիայի որդի Յովհաննէսին անապատումը: Եւ նա եկաւ Յորդանանի ամեն կողմերը, ապաշխարութեան մկրտութիւնը քարոզելով մեղքերի թողութեան համար. ինչպէս Եսայիա մարգարէի խօսքերի գրքումը գրուած է որ ասում է Կանչողի ձայնը անապատումը. պատրաստ արէք Տիրոջ ճանապարհը, եւ ուղիղ արէք նորա շաւիղները: Ամեն ձոր լցուի, եւ ամեն սար եւ բլուր խոնարհուի. եւ դժուարները հեշտ լինեն, եւ խորտուբորտները հարթ ճանապարհներ լինեն. եւ ամեն մարմին Աստուծոյ փրկութիւնը կտեսնէ» [Աստուածաշունչ, 1158]:

Այսպիսի օրինակ մենք արդեն տեսանք Հռոմի ավետարանի խորաններից մեկում, որում ասվում է. «Պատրաստ արէք զճանապարհ տեսոն և ուղիղ արարէք զշաւիղ ըսնորա»: Ինչպէս գիտենք, հուշկապարիկները մինչքրիստոնէական ժամանակաշրջանում հրեշներ էին, դժոխքի կատաղածներ, որոնք դուրսից ձայնով կանչում էին իրենց մոտ և սպանում մարդկանց: Իսկ քրիստոնէական շրջանում հավանական է, որ այդ ձայնը ավետում էր Տիրոջ գալուստը, որը կարող ենք տեսնել նաև Հովհաննէսի [Աւետարան ըստ Հովհաննու, 1.19-28: «...Եւ եմ անապատումը կանչողի ձայնը, թէ ուղղեցէք Տիրոջ ճանապարհը, ինչպէս Եսայիա մարգարէն ասեց»], Մատթևոսի (Աւետարան ըստ Մատթևոսի, 3.1-12: «Անապատումը կանչողի ձայնը. պատրաստ արէք Տիրոջ ճանապարհը, ուղիղ արէք նորա շաւիղները») և Մարկոսի (Աւետարան ըստ Մարկոսի, 1.1-8: «...Ահա եւ իմ հրեշտակն ուղարկում եմ քո երեսի առաջից, որ պատրաստէ Քո ճանապարհը քո առաջին. Կանչողի ձայնը անապատումը՝ պատրաստ արէք Տիրոջ ճանապարհը, եւ շիտակ արէք նորա Շաւիղները...») ավետարանների համապատասխան տեքստեր պարունակող էջերում: Վստահաբար կարող ենք ասել, որ քրիստոնէական շրջանում հուշկապարիկ-սիրենները բարի խորհուրդ ունեին և իրենց քաղցր ձայնով ավետում էին քրիստոնէական իրադարձությունները, տվյալ դեպքում ողջունում էին Տիրոջ գալուստը, ճանապարհը (Պտկ. 21):

1323 թ. ձեռագիր (Գլաձոր, նկարիչ՝ Թորոս Տարոնացի): Այս ձեռագրում հանդիպում ենք երկու հուշկապարիկի պատկերների, որոնցից մեկը գլխարկով է, որի վրա պատկերված է խաչ, իսկ մյուսի գլխին վառվող մում է: Այս ձեռագրի մանրանկարներում հուշկապարիկների պատկերները՝ խաչով ու մոմով, հաստատում են դրանց բարի խորհուրդ մարմնավորելը (Պտկ. 22):

Լուսանցագարդ 1331 թ. Նորավանքում գրված ձեռագրում (№3, Գրիչներ՝ Մոմիկ, Պոդոս, Հովհաննես (Mathews, 1994, 166-167): Մոմիկը 1307 թ. Հովհաննես Օրբելու հանձնարարությամբ Նորավանքում սկսել է այս ձեռագրի գրչությունը Բուրթել իշխանի համար: Մատյանի գրչությունն ու ծաղկումն ավարտել են Հովհաննես գրիչն ու երիտասարդ շնորհալի նկարիչ Թորոս Տարոնացին (այդ մասին նշված է Մոմիկի գրած հիշատակարանում): Որոշ ժամանակ անց Մոմիկի տեսողությունը վերականգնվել է, և նա գրել է ձեռագրի հիշատակարանը) [Մաթևոսյան Կ., 2010, 64-66]:

Այս ձեռագրի լուսանցագարդերից մեկում ևս Թորոս Տարոնացին պատկերել է իր սիրելի կերպարին: Մանրանկարի աջ անկյունում տեսնում ենք կանգնած հուշկապարիկի: Ոսկեգույնով եզերված է ամբողջ կերպարը, որը նաև թագի հարդարանքի ու մարմնի պատկերման մեջ է կիրառվել: Երկարամազ սիրենի թևերն արված են թանաքագույնով, իսկ ոտքերը՝ կարմիրով: Թորոս Տարոնացու մոտ գրեթե միշտ սիրենները պատկերված են վառ և հատկապես կարմիր, կապույտ գույներով այն դեպքում, երբ մյուս մանրանկարիչների մոտ կարող ենք տեսնել անգամ սևի գործածություն: Տարոնացին նաև ուշադրություն է դարձնում փետուրների, դիմագծերի մանրակրկիտ պատկերմանը, և նրա կերպարները գրեթե միշտ կանգնած են լինում պատվանդանի կամ խորանի քիվի վրա: Այս ձեռագրում մանրանկարիչը թագը կարմիր գույնով է պատկերել, ինչից էլ դուրս է գալիս բուսական հարդարանքը: Կարմիր թագով հուշկապարիկի պատկեր արդեն հանդիպեցինք Օշին Մարաջախտի ավետարանում (Պտկ. 23):

Ձեռագիր № 5786 (1336 թ., թերթ 214ա, ծաղկող՝ Սարգիս Պիծակ): Տեքստի աջ անկյունում պատկերված է հուշկապարիկ, որի մագերը արևի ճառագայթների են նման: Բերանը փակ է, նայում է տեքստին, մարմինը կանաչ գույնով է պատկերված, իսկ թևերը՝ կապույտ: Պատկերի հարևանությամբ գտնվող տեքստը հետևյալն է. «Իսկ եթե դուք որ չարքդ էք գիտեք պարզևս բարիս տալ որդուց ձերոց. ո՞ր չափ ևս առաւել հայր ձեր յերկնից տայցե բարիս այնոցիկ որ խնդրենն ի նմանէ: Հաներ դև մի համր. և եղև յելանել դիւին խաւսեցաւ համրն; և զարմացան»: Մանրանկարում տեսանք որ սիրենի պատկերը գտնվում է այն տեքստի հարևանությամբ, որում խոսվում է դևի մասին, որն Աստուծոց խնդրում է խոսել, և Աստված տալիս է նրան այդ կարողությունը: Կարելի է ենթադրել, որ խոսքը «քրիստոնեությունն է», որ տալիս է Աստված այդ էակին, և վերջինս, ընդունելով Աստծո խոսքը, բարի խորհուրդ է ձեռք բերում (Պտկ. 24):

Աստվածաշունչ, ձեռագիր № 346 (1390-1400 թթ., գրիչ՝ Պետրոս աբեղա և Հովհաննես քահանա, Մելիքսեթ: Նկարիչ՝ Հովհաննես: Ստացող՝ Հովհաննես Բաբունի, կազմող՝ Ղարիպջան Արճիշեցի, Շմաւոն վրդ.): Ձեռագրի անվանաթերթերից մեկում արդեն հանդիպել ենք հուշկապարիկի պատկերների, որի մասին խոսեցինք վերևում: Բացի անվանաթերթից՝ հուշկապարիկի պատկերների հանդիպում ենք նաև լուսանցագարդերում: Մանրանկարի տեքստի ձախ անկյունում և՛ գլխով, և՛ մարմնով աջ շրջված թագապսակ հուշկապարիկը պատկերված է այտերի բնորոշ կարմրությամբ, գեղեցիկ պոչով: Մարմինն ու պոչը մուգ կապույտ երանգներ ունեն, իսկ թագը, թևերն ու ոտքերը՝ կարմիր: Նույն ձեռագրի մեկ այլ լուսանցագարդում պատկերված է լուսապսակով հուշկապարիկ, այդպիսի օրինակ մենք հանդիպեցինք 1304 թ. ավետարանում (Ձեռ. № 3722Մ.), (Պտկ. 25, 26):

Այսպիսով՝ ուսումնասիրելով միջնադարյան մանրանկարչության մեջ՝ լուսանցագարդերում հանդիպող հուշկապարիկների պատկերները՝ կարող ենք ասել, որ մանրանկարիչները

պատահական տեքստերի հարևանությամբ չէին պատկերում այդ առասպելական էակներին: Նրանք հիմնականում հայտնվում էին այն տեքստերի հարևանությամբ, որոնցում խոսվում է «կանչողի ձայնի» մասին, և այն տեքստերի, որոնցում խոսվում է դևերի մասին, որոնք Աստուծուց խոսելու կարողություն են հայցում: Այսինքն՝ քրիստոնեական շրջանում ընդունելով Աստծո խոսքը՝ մինչ այդ դև համարվող էակները ձեռք են բերում նոր իմաստ, իսկ դարերի ընթացքում այդ իմաստը պահվում և էլ ավելի է կատարելագործվում յուրաքանչյուր մանրանկարչի կողմից:

Եզրակացություն: Հուշկապարիկ-սիրենները ինքնատիպությամբ ու բնորոշ յուրօրինակ հատկանիշների շնորհիվ հայ միջնադարյան մանրանկարչության սիրելի թեմաներից են եղել: Օժտված լինելով մեծ երևակայությամբ ու բարձր ճաշակով՝ միջնադարյան մանրանկարիչները դարերի ընթացքում զարգացրել ու կատարելագործել են այդ առասպելական կերպարների պատկերման ավանդույթները, և հայ մանրանկարչության մեջ վերջիններս ձեռք են բերել հայկական առանձնահատկություններ:

Ամփոփելով ասվածը՝ եզրակացնենք, որ մինչքրիստոնեական շրջանում դևերի, հրեշների, չար ոգիների իմաստ ունեցող հուշկապարիկ-սիրենները, որոնց մասին հիշատակվում է դիցաբանական լեգենդներում, քրիստոնեական շրջանում ձեռք են բերում լիովին նոր իմաստավորում: Հուշկապարիկները հայտնի էին իրենց քաղցր ու դյուրիչ ձայնով: Հավանական է, որ եթե քրիստոնեության ընդունումից առաջ իրենց դյուրիչ ձայնն օգտագործում էին մարդկանց գերելու ու սպանելու համար, ապա քրիստոնեական շրջանում իրենց դյուրիչ ձայնով ավետում էին քրիստոնեական իրադարձությունները: Այդ մասին են վկայում բազում օրինակներ, ինչպես նաև մանրանկարներում վերջիններիս բաց բերաններով պատկերելը: Այդպիսի օրինակ մենք տեսանք Հռոմկլայի 1244 թ. ավետարանում: Հուշկապարիկները ավետաբեր արարածներ էին, և նրանց գլխավոր գործառույթներից մեկը եղել է Աստծո կողմից երկրի ու երկնքի արարման մասին ավետելը: Այդ մասին են վկայում համապատասխան տեքստի հարևանությամբ պատկերված լինելը: Այդպիսի օրինակ մենք հանդիպեցինք №346 Մ. Աստվածաշնչում: Հուշկապարիկներին՝ որպես քաղցր ձայնով էակների, պատկերել են նաև խազգրքերում, իսկ վերջինիս քրիստոնեական իրողություններ ավետելու մասին վկայում է պատկերումը Քրիստոսի կերպարի հարևանությամբ: Ավելի ուշ խաչքարային հորինվածքներից մեկում (XVI դ.) վերջիններս պատկերվում էին Տիրամոր աջ ու ձախ կողմերում: Մանրանկարչական այդպիսի օրինակ մենք արդեն տեսանք № 7157 Մ. ձեռագրում: Հուշկապարիկի դերակատարումներից ևս մեկը եղել է Քրիստոսի հարության մասին ավետելը: Այդ մասին է վկայում Սարգիս Պիծակի կողմից 1322 թ. շարակնոցում համապատասխան տեքստի հարևանությամբ պատկերված լինելը: Ավետարաններում հաճախ ենք հանդիպում հուշկապարիկների պատկերների հետևյալ տեքստի հարևանությամբ. «Գիրք ծննդեան ՅՆ(Յիսուսի) ՔԻ(Քրիստոսի) որդիոյ Դաւթի որդիոյ Աբրահամու: Աբրահամ ծընաւ զԻսահակ: Իսահակ ծընաւ զյակովբ: Յակովբ ծընաւ զյուդա և զեղբարս նորա...» [Ձեռ. №4820, №1949 Մ. և այլն]: Այստեղից կարող ենք եզրակացնել, որ վերջիններս ավետում էին Քրիստոսի տոհմաբանությունը: Եզակի օրինակ է Օշին Մարաջախտի Ավետարանի նվիրաբերման էջում պատկերված երկմարմին հուշկապարիկի պատկերը, որը հավանաբար կապված է «Քրիստոսի մեկ անձ երկու բնություն» բանաձևի հետ:

Պատկերելով երկու մարմիններ՝ մանրանկարիչը նկատի է ունեցել մարդկային ու աստվածային էությունները, իսկ մարդկային գլուխը, որն ունի թագի պատկեր, հավանաբար Քրիստոս Աստվածն է, որը շարժում է այդ երկու ուժերին: Թարգմանչաց ավետարանի «Տիրամոր նինջը» ներկայացնող տեսարանում հուշկապարիկների պատկերումը ևս մեկ անգամ հաստատում է այն տեսակետը, որ վերջիններս ավետաբեր էակներ էին և այստեղ ավետում էին Տիրամոր երկինք տեղափոխվելը: Հուշկապարիկի պատկերների հանդիպում ենք այն տեքստերի հարևանությամբ, որոնցում ասվում է. «Կանչողի ձայնը անապատումը՝ պատրաստ արեք տիրոջ ճանապարհը. և ուղիղ արարեք զշաւիղ ընտրա...»: Այս տեքստերի հարևանությամբ հուշկապարիկների պատկերներ հայտնվում են ոչ միայն խորաններում, այլ նաև լուսանցագարդերում: Այդպիսով կանչողի ձայնը քրիստոնեական շրջանում ավետում էր Քրիստոսի գալուստը և ճանապարհի բացում մարդկանց համար դեպի քրիստոնեական հավատքը: Այդպիսի օրինակ մենք արդեն տեսանք № 2952 Մ. ձեռագրում և Հռոմի ավետարանում: Ուսումնասիրված հուշկապարիկների պատկերների մեծամասնությունը կարմիր ու կապույտ են: Կարմիրը խորհրդանշում է Աստծու որդու գոհաբերած արյունը, անձնագոհությունը, իսկ կապույտը աստվածայինի, երկնքի, հավերժության գույնն է, համահունչ է խոնարհությանը, բարեպաշտությանը: Այնուամենայնիվ, նյութի ուսումնասիրությունը չենք կարող ավարտված համարել. դեռ շատ կան նոր ու չլուսաբանված ձեռագրեր հայ մանրանկարչության մեջ, որոնց մանրագին վերլուծությունները կարող են լուսաբանել նաև հուշկապարիկ-սիրենների դերի ու նշանակության մասին հայ միջնադարյան արվեստում:



Նկ. 1. Հաղբատի ավետարան



Նկ. 2. Հռոմկլայի ավետարան



Նկ. 3. Գիրք ձեռնադրութեանց



Նկ. 4. Հռոմի ավետարան



Նկ. 5. Զեյթունի ավետարան



Նկ. 6. Կիլիկիայի ձեռագիր



Պտկ. 7. Օշին Մարաջախտի ավետարան



Պտկ.8 Ձեռ. № 1746



Պտկ. 9 Ձեռ. № 9422



Պսկ. 10. Ձեռ. № 4820



Պսկ. 11. Ձեռ., № 3722



Պսկ. 12, Ձեռ. №1917



Պսկ. 13. Ձեռ. №1917




Պսկ. 14. Ձեռ. №1949



Պսկ. 15 Սարգիս Պիժակի կողմից ստեղծված շարակնոց



Պսկ. 16. Ձեռ. № 6289




Պսկ. 17. Ձեռ. № 7157



Պսկ. 18. Ձեռ. № 346



Պտկ. 19. Ձեռ. № 6305



Պտկ. 20. Թարգմանչաց ավետարան



Պտկ. 21. Ձեռ. № 2952



Պտկ. 22. 1323 թվի ձեռագիր



Պտկ. 23. Լուսանցագարդ 1331 թ.



Պտկ. 24. Ձեռ. №5786



Պտկ. 25. Ձեռ. № 346



Պտկ. 26. Ձեռ. № 346

Գրականության ցանկ

- Ամիրխանյան Ռ.**, «Խորան բառի ծագումնաբանական ասպեկտները Եվսեբիոսի համաձայնության աղյուսակների գեղարվեստական հարդարանքի համատեքստում», 157 էջ :
- Ավետիսյան Ա. Ն.**, 1971, Հայկական մանրանկարչության Գլաձորի դպրոցը, Հայկական ՍՍՀ ԳԱ հրատարակչություն, Երևան, 87 էջ :
- Ավետիսյան Բ.**, 2007, «Աստվածամոր ննջի» պատկերագրությունը հայ միջնադարյան արվեստում, Ը 49 էջ :
- Աստուածաշունչ, Աւետարան ըստ Ղուկասու, Գլուխ Գ, Յովհաննէսի քարոզելը և մկրտելը: Քրիստոսը մկրտվում է: Նորա ազգաբանութիւնը, 1158 էջ :
- Ղուռնովո Լ. Ա.**, 1969, Հայկական մանրանկարչություն, «Հայաստան» հրատարակչություն, Երևան, էջ 208:
- Թահմիզյան Ն.**, 1980, Նյութեր հայկական և ռուսական հոգևոր միջնադարյան երգարվեստների համեմատական ուսումնասիրության, «Բանբեր Մատենադարանի», Երևան, 118 էջ :
- «Հայկական մանրանկարչութիւն», 2000, Մխիթարեան մատենադարան ձեռագրաց, Բ., Մխիթարեան հրատարակչություն, Վենետիկ Ս. Ղազար, 9-10 էջ :
- «Հայկական մանրանկարչութիւն», 2000, Մխիթարեան մատենադարան ձեռագրաց, Բ, Մխիթարեան հրատարակչություն, Վենետիկ Ս. Ղազար, 29 էջ :
- «Հայկական մանրանկարչություն», 2014, Մատենադարանի հավաքածու, Երևան, «Նաիրի», 66 էջ:
- «Հայկական մանրանկարչություն», 2014, Մատենադարանի հավաքածու, Երևան, «Նաիրի»:

- Հակոբյան Հ., 1989, Արցախ-Ուտիքի մանրանկաչական դպրոցի մի խումբ ձեռագրեր, Երևան, «Խորհրդային գրող», 135 էջ:
- Ճանաչեան Մ., 1966, Հայկական մանրանկարչություն, Մխիթարեան մատենադարան ձեռագրաց Ս, 60-61 էջ:
- Մաթևոսյան Կ., 2010, Մոմիկ, Երևան 64-66 էջ:
- Մալխասեանց Ս., 1944, Հայերեն բացատրական բառարան, Երևան, Հայկական ՍՍՌ պետական հրատարակչություն, 1567 էջ:
- Չուգասյան Լ. Բ., 1986, Գրիգոր ծաղկող, Երևանի համալսարանի հրատարակչություն, Երևան, 114 էջ:
- Չուգասյան Ս., 2014, Ս. Մաշտոցի անվան մատենադարանի թիվ 9422 ձեռագրի մանրանկարչությունը Միջերկրական ծովի արվեստի համատեքստում, սեղմագիր, Երևան, 1 էջ:
- Վասպուրականի հայկական մանրանկարչություն, 1978, «Սովետական գրող» հրատարակչություն, Երևան:
- Գ. Տաթևացի, 2020, «Գիրք հարցմանց», թարգմանությունը՝ Սուսաննա Գրիգորյանի, «Տիգրան Մեծ» հրատարակչություն, Երևան:
- «Ցուցակ ձեռագրաց Մաշտոցի անվան Մատենադարանի», 1970, հատոր Ա, Հայկական գիտությունների ակադեմիայի հրատարակչություն, Երևան, 627 էջ:
- «Ցուցակ ձեռագրաց Մաշտոցի անվան Մատենադարանի», 1970, հատոր Ա, Հայկական գիտությունների ակադեմիայի հրատարակչություն, Երևան:
- Манукян С., 2008, Рубрикация в системе художественного оформления Армянских рукописных Евангелий, Автореферат, Ереван, с. 19-20.
- Khandanian A., 1978, Le theme de la Sirène-oiseau dans l'enluminure des manuscrits arméniens, Atti del Primo Simposio Internazionale di Arte Armena (Bergamo 28-30 giugno 1975), San Lazzaro-Venezia, pp. 377-394.
- “Manuscripts armeniens illustres...”, p. 110.
- Mathews F., Thomas and Roger S. Wieck (1994), Treasures in Heaven Armenian illuminated Manuscripts, The Pierpont Morgan Library, New York, Princeton University Press, Pierpont Morgan library, pp. 193-194.